



Tukiran menunjukkan ban sungai yang sering pecah dan mengakibatkan banjir di kampungnya.

[FOTO MOHD SHUKOR AMIN / BH]



“Sudahlah hidup miskin, rumah kami pula sering dilanda banjir”

Tukiran Rahani, Penduduk

Penduduk rayu bina benteng sungai

» Sudah 3 kali ban pecah, banjir kilat berlaku

Oleh Mohd Shukor Amin
bhshahalam@bh.com.my

► Sabak Bernam

Lebih 15 keluarga di Projek Perumahan Rakyat Termiskin (PPRT), Kampung Sungai Tengar Utara merayu kerajaan Selangor

segera membina ban atau benteng sungai lebih kukuh bagi mengelak banjir berulang.

Penduduk, Tukiran Rahani, 49, berkata tahun ini saja sudah tiga kali penempatan mereka dilanda banjir akibat ban pecah menyaksikan penduduk kerugian harta benda.

Sering dilanda banjir

“Sudahlah hidup miskin, rumah kami pula sering dilanda banjir. Apabila banjir kami terpaksa meninggalkan pekerjaan sebagai sumber rezeki bagi memastikan keselamatan nyawa dan harta benda.

“Benteng yang dibina sekarang menggunakan cerucuk batang kelapa dan timbunan tanah biasa. Ia tidak berapa kukuh bagi menahan air pasang besar dan hakisan akibat ombak, kesan banyak bot nelayan melalui kuala sungai itu,” katanya.

Tinjauan Sentral BH mendapati kehidupan penduduk semakin buruk apabila turut dilanda banjir akibat air laut pasang dan ada penduduk menyatakan, setiap dua minggu rumah mereka akan dinaiki air akibat air pasang besar.

Penduduk Kampung Dato Hormat, Norizami Jemekir, 38, berkata pembinaan benteng sungai mengguna batu atau konkrit dirasakan dapat menyelesaikan masalah itu daripada berulang seterusnya menghapuskan kebimbangan penduduk.

Lebih prihatin

“Kami amat berharap kerajaan negeri Selangor lebih prihatin terhadap kesusahan penduduk di sini dan kami harap mereka mengambil tindakan sewajarnya bagi menyelesaikan masalah ini,” kata Norizami yang bekerja sebagai nelayan.

Kerajaan negeri perlu jaga kebajikan

Ahli Dewan Undangan Negeri (ADUN) Sungai Air Tawar, Kamarul Zaki Abdul Malik, berkata pihaknya memahami keperitan penduduk dan akan cuba sebaik mungkin untuk membantu menyelesaikan permasalahan ini, namun pihak yang bertanggungjawab terutama kerajaan Selangor perlu bertindak lebih proaktif.

“Kita berharap kerajaan negeri Selangor dan Jabatan Pengairan Selangor (JPS) mengkaji dengan lebih mendalam pembinaan benteng yang lebih sesuai di tempat ini.

“Kerajaan negeri perlu mengambil berat rintihan penduduk yang mengharapkan kebajikan seperti yang sering dilaungkan selama ini,” katanya ketika ditemui.